



Republika e Kosovës
Republika Kosovo – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO



A.nr.577/2026

Këshilli i Pavarur Mbikëqyrës për Shërbimin Civil të Kosovës–Kolegji për Shqyrtimin dhe Vendosje e Ankesave, në përbërje nga: Eshref Shabani-kryetar, Ardita Haxhnikaj-Demi dhe Malsore Gashi Bajraktari-anëtare, me Rushit Kajtazi, në cilësinë e procesmbajtësit, në procedurë sipas ankesës me numër A.nr. 577/2026 të datës 26.05.2026, të parashtruar nga ankuesi G.D, kundër organit të punësimit/Komuna e Mitrovicës së Jugut, në çështjen juridike “ Masë Disiplinore”, duke vepruar në pajtim me nenin 6 paragrafin 1 nën paragrafin 1.1, nenin 16 paragrafi 3, dhe nenin 18 paragrafin 1 nën paragrafin 1.8 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr.02/2018 për Procedurën e Shqyrtimit dhe Vendorsjes së Ankesave në Këshillin e Pavarur Mbikëqyrës për Shërbimin Civil të Kosovës, me datë 21.07.2026, mori këtë:

V E N D I M

I. Këshilli i Pavarur Mbikëqyrës për Shërbimin Civil të Kosovës shpallet jo kompetent për të shqyrtuar dhe vendosur lidhur me ankesën A.nr. 577/2026 të datës 26.05.2026,e parashtruar nga ankuesi G.D.

II. Lënda i dërgohet për shqyrtim dhe vendosje Komisionit për Ankesa, në Komunën e Mitrovicës së Jugut.

A r s y e t i m

G.D (në tekstin e mëtejme referuar: Ankuesi), me datë 26.05.2026, ka parashtruar ankesë në Këshillin e Pavarur Mbikëqyrës për Shërbimin Civil të Kosovës e regjistruar nën shenjën A.nr.577/2026, kundër vendimit me numër protokoli 07-030/01-008968/6/26, të datës 30.04.2026, të Komisionit Disiplinor për Nëpunësit e Shërbimit Publik dhe Nëpunës Teknik dhe Mbështetës.

Kolegji për Shqyrtimin dhe Vendorsjen e Ankesave (në tekstin e mëtejme referuar: Kolegji i Këshillit) administroi këto prova: Ankesën me numër protokoli 2470/2026, e datës 26.05.2026,e parashtruar nga ankuesi drejtuar Këshillit të Pavarur Mbikëqyrës për Shërbimin Civil të Kosovës; Vendimi i datës 18.02.2014; Kopjen e letërnjoftimit për ankuesin G.D; Kontratën e Punës të datës 15.11.2019; Vendimin e datës 30.04.2026, të Komisionit Disiplinor; Ankesa e datës 18.05.2026; drejtuar Komisionit Disiplinor; Ankesën e datës 26.03.2026, drejtuar Komisionit të ankesave në

drejtorinë për financa; Ankesën e datës 22.10.2024; Ankesën e datës 28.08.2024; Vendimi i datës 05.04.2024; Ankesë e datës 16.02.2025; Vendimi i datës 20.12.2024.

Kolegji për Shqyrtimin dhe Vendorsjen e Ankesave (në tekstin e mëtejshëm referuar: Kolegji i Këshillit) nga administrimi i shkresave të lëndës ka gjetur se Këshilli i Pavarur Mbikëqyrës për Shërbimin Civil i Kosovës nuk është kompetent për të vendosur për ankesën me numër A.nr. 577/2026, të datës 26.05.2026, të parashtruar nga ankuesi, G.D, **sepse:**

Nga administrimi i provave të lëndës rezulton se ankuesi G.D. sipas kontratës së punës, të datës 15.11.2019, mbanë pozitën e punës “Profesor”, në SHMLT “Artitekt Sinani në Mitrovicë.

Tutje Komisionit Disiplinor për Nëpunësit e Shërbimit Publik dhe Nëpunës Teknik dhe Mbështetës i Komunës së Mitrovicës së Jugut, përmes vendimit me numër protokoli 07-030/01-008968/6/26, të datës 30.04.2026, ankuesit i shqipton masën disiplinore “*Pezullim nga pozita pa pagesë në kohëzgjatje prej gjashtë (6) muajsh*”.

Ankuesi G.D, i pakënaqur me vendimin me numër protokoli 07-030/01-008968/6/26, të datës 30.04.2026, të Komisionit Disiplinor për Nëpunësit e Shërbimit Publik dhe Nëpunës Teknik dhe Mbështetës i Komunës së Mitrovicës së Jugut, me datë 26.05.2026, ka parashtruar ankesë, në Këshillin e Pavarur Mbikëqyrës për Shërbimin Civil të Kosovës, me pretendimet ankimor kundër vendimit me numër protokoli 07-030/01-008968/6/26, të datës 30.04.2026, lidhur me shqiptimin e masës disiplinore “*Pezullim nga pozita pa pagesë në kohëzgjatje prej gjashtë (6) muajsh*”.

Në kuptim të përcaktimit të kompetencës së Këshillit për shqyrtim dhe vendosje lidhur me këtë çështje administrative, Kolegji i Këshillit iu referua Ligjit Nr.08/L-197 për Zyrarët Publikë, gjegjësisht nenit 5 më të cilin përcaktohet se:

Kategoritë e zyrtarëve/publik janë: 1.1. Nëpunësja/i i shërbimit civil; 1.2. Nëpunësja/i i shërbimit publik; 1.3. Krijuesja/i dhe performuesja/i e/i artit dhe kulturës; 1.4. Nëpunësja/i teknik dhe mbështetës; dhe 1.5. Zyrtarja/i i kabinetit. 2. Nëpunësja/i i shërbimit civil është zyrtarja/i publik në kuadër të shërbimit civil i cili merr pjesë në formulimin dhe/apo zbatimin e politikave, monitorimin e zbatimit të rregullave dhe procedurave administrative dhe ofrimin e mbështetjes së përgjithshme profesionale dhe administrative në zbatim. Nëpunësja/i i shërbimit civil ushtron detyrën në pozitën përkatëse, duke filluar nga zyrtarja/i profesional deri në pozitën e drejtueses/it të lartë, në administratën e Presidentes/it të Republikës së Kosovës, në administratën e Kuvendit të Republikës së Kosovës, në Zyrën e Kryeministres/it të Republikës së Kosovës, në Ministri, në Agjenci Ekzekutive dhe në degë lokale të tyre, institucione të pavarura kushtetuese, në agjenci të pavarura dhe rregullatore, në administratën komunale dhe çdo nëpunës/ës statusi i të cilit është përcaktuar si nëpunës/ës i shërbimit civil, me ligj të veçantë. 3. Nëpunësja/i i shërbimit publik është zyrtarja/i publik i cili ofron shërbime publike të drejtpërdrejta për qytetarët në fushën e arsimit, shëndetësisë, kulturës, artit, në fushën e mjekësisë ligjore, si dhe shërbime tjera të ngjashme publike. Nëpunësja/i i shërbimit publik ushtron detyrën në pozitën përkatëse duke filluar nga niveli profesional deri në nivelin e lartë drejtues.

Nëpunësja/i i shërbimit publik është edhe nëpunësja/i i shërbimeve të brendshme në administratën e shërbimeve publike pjesë e administratës shtetërore, në administratën e shërbimeve publike apo pjesë e komunës....” rrjedhimisht në kuptim të këtyre dispozitave ligjore rezulton së të gjithë të punësuar duke përfshirë zyrtarët e nivelit të lartë drejtues, drejtues, profesional dhe shërbimeve të brendshme në kuadër të institucioneve publike arsimore të Kosovës kanë statusin e nëpunësit të shërbimit publikë, kështu, nisur nga fakti se ankuesi sipas kontratës së punës, të datës 15.11.2019, mbanë pozitën e punës “Profesor”, në SHMLT “Artitekt Sinani në Mitrovicë. Kolegji konstaton së ankuesi nuk e ka statusin e nëpunësit civil, andaj, bazuar në nenin 6 paragrafin 1 nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, ku përcaktohet se Këshilli është kompetent për të shqyrtuar vetëm ankesat e nëpunësve civilë dhe kandidatëve për pranim në Shërbimin Civil, rrjedhë së Këshilli i Pavarur Mbikëqyrës për Shërbimin Civil të Kosovës nuk është kompetent për të vendosur lidhur me ankesën A.nr. 577/2026 të datës 26.05.2026 të parashtruar nga ankuesi.

Pas konstatimit si më lartë se Këshilli i Pavarur Mbikëqyrës për Shërbimin Civil të Kosovës nuk ka juridiksion për të vendosur lidhur me ankesën me numër A.nr.577/2026 të datës 26.05.2026 dhe meqenëse nga shkresat e lëndës nuk vërehet se pala ankuese nuk ka shfrytëzuar mjetet juridike në procedurë administrative pranë organit punëdhënës, Kolegji duke u bazuar në nenin 8, të Ligjit Nr. 08/L-294 për Ndryshimin dhe Plotësimin e Ligjit Nr. 08/L-197 për Zyrtaret Publik, si dhe nenin 75 paragrafi 1 të Ligjit Nr.05/031 për Procedurën e Përgjithshme Administrative, si dhe nenin 18 paragrafin 1 nën paragrafin 1.8 të Ligjit Nr.06/L-048 për Këshillin e Pavarur Mbikëqyrës për Shërbim Civil të Kosovës, vendosi që të shpallë veten jo kompetent për të vendosur lidhur me ankesën A.nr. 577/2026 të datës 26.05.2026 dhe të bartë lëndën të organi kompetent, në këtë rast Komisioni i Ankesave në Komunën e Mitrovicës së Jugut.

Bazuar si më sipër, e në mbështetje të nenit 18 paragrafin 1 nën paragrafin 1.8 të Ligjit Nr.06/L048 për Këshillin e Pavarur Mbikëqyrës për Shërbim Civil të Kosovës, Kolegji i Këshillit vendosi si në dispozitiv të këtij vendimi.

Vendimi hyn në fuqi në ditën e nënshkrimit nga Kryetari i Kolegjit.

KËSHILLË JURIDIKE: Kundër vendimit të Këshillit, pala e pakënaqur mund të iniciojë konflikt administrativ në Gjykatën Administrative në Prishtinë- Departamenti për Konteste të Punës, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
LËNDA A.nr.577/2026.

Rushit Kajtazi

Eshref Shabani

Procesmbajtës

Kryetar i Kolegjit

Vendimi i dorëzohet:

- Ankuesit G.D;
- Komisionit për Ankesa në Komunën e Mitrovicës së Jugut;
- Udhëheqësit të Personelit në Komunën e Mitrovicës së Jugut; dhe
- Arkivit të KPMSHCK-së;